

Thursday, February 20, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

GOVERNOR – STATE DAY

Larsap Gen. Vijay Kumar Singh chuan vawiin, state puitlinga Mizoram hlan kai a nih champha pualin Mizoram mipui chibai bukin duhsakna a hlan.

Larsap chuan tun ang hun February ni 20, 1987 khan Mizoram chu India ram State 23-na ni tura hlankai niin, he ni pawimawh tak hi Mizoram tana hmasawwna, remna leh hlawhtlinna tura bultanna thar duhawm tak a ni, a ti a. He ni hi tuarchhelna, inpumkhatna leh Mizo mipuite beiseina a taka chantirna leh nemnghehna a ni a. Inbiakna leh mipui thlan rorelna kaltlanga hnehna lantir niin, hemi avang hian Mizoram Inremna Thuthlung (Peace Accord) chu June ni 30, 1986 khan India Sawrkar leh Mizo National Front te chuan an ziaak a; hei hi India ram chanchina inremna hlawhtling bera ni hiala ngaih a ni, a ti. General VK Singh chuan State a hlankai a nih hnuah Mizoramin zirna, hriselna, hmasawwna ruhrel siam leh nitin khawsak kawngah hmasawwna chhinchhiah tlak tak tak a nei a. Mizo hnam ziarang hausa takte, nunphung nghet tha tak bakah, lungruah leh inpawh tlang taka khawsak honate hian ram pum a fan hneh hle a ni, a ti bawk.

Sawrkar laipui ruahmanna, India ram State leh Union Territory hrang hranga chengte inkara inhriatthiamtawwna leh inpumkhatna tizual deuh deuh tura hmalakna, 'Ek Bharat Shreshtha Bharat' chungchang sawiin larsap chuan hnam hrang hrangte inkarah inunauna leh inpumkhatna siam a, India khua leh tui kan nihna tihfiah zual a tum a ni, a ti a. Hetiang a nih avang hian India khua leh tuite inpumkhatna tura hmalakna, 'Ek Bharat Shreshtha Bharat' thil tumte hre reng chungin, midangte hnam ziarang leh nunphungte inngaihven saka inzirtawn turin mitin a sawm a. Mahni hnam ziarang leh nunphungte hloh then chuang hauh lovin hnam inpumkhatna hi a kalpui theih reng a ni, a ti a ni.

He ni chhinchhiah tlak tak lawm a nih mek mek rual hian Mizoram leh India ram chak leh hlawhtling zawk siam turin intiam thar leh theuh turin mipui a sawm a. Ram leh hnam rohlute vawngghim chung zel leh, chhuan lo la awm turte hmakhua ngai chung zelin lungruah takin hmasawwna hna thawk tlang zel turin a sawm bawk a. India rama cheng hrang hrangte hnam ziarang leh nunphungte zaha vawngghimtu mai bakah, India ram chu kum 2047-ah ram changkang leh intodelh 'Vikshit Bharat' ni tura hmalakna kawngah theihtawp chhuah theuh turin Mizoram mipui a sawm bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



ASSEMBLY SESSION

Nimin atanga tan, Mizoram legislative assembly inkhawm hun chhunga ngaihtuah turin dan thar siam tur leh dan dinglai siamthat tura rawtna 7 thehluh a ni tawh.

Assembly secretariat atanga thudawn danin sorkar bill thehlut tawhtute hi LESDE, UD&PA, Finance, Higher & Technical Education, Information & Public Relations, Excise & narcotics department te an ni. Vawiin hi state puitlinga Mizoram hlankai a nih champha a nih avangin pisa chawlh a ni a, assembly inkhawm pawh chawlh a ni. Naktukah Prime Minister hlui Dr. Manmohan Singh sunna hun bakah, zawhna leh chhanna hun hman a ni ang a, larsap thusawi chunga lawmthu sawina motion sawiho a ni ang a, chumi hnuh hun awm dan a zirin private member resolution sawiho tura thum vawr hmanga thlan sawiho a ni ang.

Zawhna hi nimin tlai thleng khan House chhunga chhan chi (starred question) 863 leh ziaka chhan chi (unstarred question) 98 a lut tawh a. House dawhkana dah tur lehkhaw pawimawh 5 lut tawh baw. Private resolution hi 85 a lut tawh baw.

Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma'n tangka kum thar (2025-2026) atana Mizoram sum hman tur ruahman (annual budget) leh kumin tangka kum kal lai a sum indaih lohna phuhrukna tur (supplementary demands for grants for 2024-2025) chu a pharh ang a. Hei hi Pu Lalduhoma'n budget a vawi 2 pharhna tur a ni. Assembly inkhawm hi March ni 20 thleng thutkhawm tura ruahman a ni.



TAXI COLOUR

State Transport Authority (STA) chuan Two Wheeler Taxi zawng zawng chu rawng in ang leh colour sticker bel dan in ang vek hmang vek turin a hriattir.

Nikum December ni 13-a State Transport Authority thukhawm chuan Mizoram a Two Wheeler Taxi te tan rawng in ang tlang (Uniform Colour) hman nise tiin a rel a. Two Wheeler Taxi rawng (colour) hman tur pawh a duang fel nghal a ni. Two Wheeler Taxi rawng tura duan hi a thar register tur zawng zawng te chuan an zawm nghal tur a ni a. Two Wheeler Taxi register tawh, tuna tlan mek te chuan he hriattirna chhuah atanga thla ruk chhungin an lirthei rawng an thlak fel hman tur a ni.



MPLAN WORKSHOP

Planning & Programme Implementation Department chuan Mizoram chhunga hmasawnna hnathawh tur ruahmanna hrang hrang thehluhna tur Mizo Plan Analytics, Software (MPLAN) chungchang workshop chu nimin khan a buatsaih.

Workshop hi Mizoram Sorkar Department hrang hrang Nodal Officers te tana buatsaih niin, MPLAN hi tangka kum thar aţangin hman ţan tawh tur a ni ang a. Department-te pawhin, ruahmanna thar an neihte chu he software/portal-ah hian dahlut zel tawhin, hnathawh dan endik hna pawh hemi kaltlang tho hian tih vek tawh tur a ni Dawn a. Hei bakah hian, software in a ken tel Dashboard hmangin Chief Minister leh Minister dang ten ramchhunga hmasawnna hnathawh hrang hrangte chu an endik thei tawh dawn bawk a ni.

MPLAN software hi NITI Aayog hnuaia sum hmuh atanga duan niin, Mizoram chhunga hmasawnna hnathawh hrang hrangte awlsam leh kimchang taka en mai theihna tur te, project hrang hrang tha lehzual samkhai zawka thlan a nih theih na'n leh thil chhinchhiahna tha zawk neih theihna atan te a buatsaih a ni.

